

## Reglugerð um breyting á reglugerð nr. 10 16. febr. 1929, um eftirlit með verksmiðjum og vélum.

### 1. gr.

Aftan við fyrri málsgrein 2. gr. komi ný málsgrein, er orðist svo:

Hver sá, sem selur vél, hvort heldur er kaupmaður eða vélsmiðja, sem hefur smíðað hana, skal tilkynna skoðunarmanni söluna. Skal tilgreina smiðjuheiti, smíðaár og smíðanúmer vélar. Taka skal fram til hvers á að nota vélina og hve mörg hestöfl hún er, ef um aflvél er að ræða.

Ársfjórðungslega skulu rafmagnsveitur tilkynna skoðunarmanni hverjar breytingar verða á rafhreiflum, sem straum fá frá rafstöðinni. Tilgreina skal verksmiðjuheiti, stærð og númer hvers hreifils, sem settur er upp og tengdur við straumkerfi veitunnar eða tekinn niður.

Eigandi eða stjórnandi fyrirtækis skal þegar tilkynna skoðunarmanni allar þær breytingar, sem gerðar eru á fyrirkomulagi véla eða húsa fyrirtækisins. Enginn má taka í notkun nýuppsetta vél eða eldri vél, sem hefur verið færð úr stað eða breytt, nema hann hafi til þess fengið leyfi skoðunarmanns.

### 2. gr.

Aftan við 5. gr. komi ný málsgrein, er orðist svo:

Beitingu á línu og fiskþvottur framkvæmist á tímabilinu 1. nóv. til 1. apríl innanhúss eða í lokuðum skýlum. Á vinnustöðvum, þar sem því verður við komið án mjög mikils tilkostnaðar, skulu slíkar vinnustofur hitaðar, svo að frostlaust sé, og ylja þar vatn til fiskþvotta, svo að það sé ekki kaldara en 8°C. Vinnustofur til beitinga og fiskþvotta, sem gerðar eru eftir að ákvæði þetta gengur í gildi, skulu vera með umbúnaði til upphitunar á vinnustofu og þvottavatni.

### 3. gr.

Á undan síðustu málsgrein 10. gr. komi tvær nýjar málsgreinar, er orðist svo:

Á vinnustöðvum, þar sem verkamenn klæðast sérstökum vinnufötum, skulu vera læstir fataskápar.

Verkamönnum skal séð fyrir hæfilega mörgum þvottatækjum, þar sem svo hagar til, að verkamenn svinna mikið eða verða fyrir miklum óhreinindum vegna vinnunnar, skulu þeir eiga kost á heitu steypubaði ef vinnustöðin hefur heitt vatn til umráða og baðumbúnaði verður komið fyrir á verulegs kostnaðar.

### 4. gr.

Á eftir 11. gr. komi ný grein, sem verður 12. gr., er orðist svo:

Þar, sem gerð eru hús eða skýli fyrir verkafólk, svo sem síldarfólk, fiskimenn, verksmiðjufólk o. þ. v. l., skulu þau og allur aðbúnaður og umgengni vera viðunandi að áliti skoðunarmanns, þannig að gætt sé hreinlætis, reglusemi og hollustuhátta. Að öðru leyti skulu þau fullnægja eftirfarandi skilyrðum.

1. Í svefnskálum skal hver maður hafa rúm fyrir sig, að minnsta kosti 1.80 m á lengd og 0.75 m á breidd. Á milli rúma skal ekki minna en 0.75 m, en liggja rúm samhliða hvort öðru, skal þó eitt skilrúm milli þeirra. Kvenfólk skal hafa svefnklefa sérgreinda frá svefnklefum karla.

Leyfilegt er að gera rúmaráðir tvöfaldar, efri og neðri rúm, enda sé þá hæð undir loft ekki minni en 2.75 m og loftrými ekki undir 8.80 tenm. á mann.

Í svefnskála eða aðliggjandi matstofu, skulu vera nægileg þvottatæki til þess að skálabúar geti þvotti sér greiðlega, en sé engin vatnsveita eða afrennsli og þvottaskálar notaðar, skal hver skálabúi hafa sína þvottaskál og þurrku fyrir sig.

Í svefnskála eða á öðrum jafn hentugum stað, skulu vera lokaðir skápar eða aðrar hirzlur fyrir skálabúa, sem nægja brýnustu þörfum til fatageymslu o. þ. v. l.

2. Borðstofa af einfaldri gerð skal gerð í sambandi við svefnskálann, svo stór, að minnsta kosti helmingur skálabúa geti borðað í senn.

3. Eldhús og búr skal fylgja hverjum skála, svo stórt að nota megi til allra brýnna þarfa.

4. Einfalt salerni skal fylgja hverjum skála, þannig gert og hirt að óþrifnaður stafi ekki af.

Ofn skal vera í hverjum skála, sem nægja til þess að hitastig sé ekki undir 10°C í svefnskála og matstofu. Þar skal og vera umbúnaður til hæfilegrar loftræstingar. Heimilt er að gera svefnskála og matstofu sem eitt herbergi ef hentugra þykir.

Verkafólki skal séð fyrir nægilegi og góðu neyzluvatni.

Heimilt er skoðunarmanni að gefa eiganda vinnustöðvar hæfilegan frest til þess að fullnægja hér settum skilyrðum.

## 5. gr.

Á eftir 39. gr., sem verður 40. gr., komi nýr staflíður og ný grein, sem verður 41. gr., svo hljóðandi:

D. Sala og uppsetning eimkatla og véla. 41. gr.

Seljandi vélar eða eimketils, hvort heldur um er að ræða ný tækni eða gömul, ber ábyrgð á því, að tækni þessi fullnægi að smíði og frágangi að öllu leyti kröfum þeim, sem eftirlitið gerir til öryggisbúnaðar.

Sá, sem setur upp eimketil eða vél eða tækni í sambandi við eimketil eða vél, ber ábyrgð á, að frágangur allur sé samkvæmt kröfum þeim, sem gerðar eru um öryggisbúnað.

Þeir einir hafa leyfi til að setja upp eimketil eða vél, sem eftirlitsskyld er og nokkur hættu getur stafað af, eða önnur slík tækni, eða standa fyrir slíku verki, sem til þess hafa hlotið viðurkenningu skoðunarstjóra vélaeftirlitsins.

## 6. gr.

Á eftir síðari málsgrein 45. gr., sem verður 47. gr., komi ný málsgrein, er orðist svo:

Í hverju fyrirtæki, þar sem 10 menn eða fleiri vinna saman, skulu verkamenn velja sér trúnaðarmann, sem viðurkenndur er af vinnuveitanda eða trúnaðarmanni hans. Skal trúnaðarmaður þessi í samráði við vinnuveitanda fylgjast með starfstilhögun í fyrirtækinu og líta eftir, að haldnar séu settar reglur um hollustuhætti og öryggisbúnað. Skulu menn þessir jafnan vera skyldir að gefa skoðunarmanni bendingar um, hvað betur mátti fara og svara spurningum, sem hann kann að leggja fyrir þá í sambandi við eftirlitið.

## 7. gr.

58. gr. falli burt, en í stað hennar komi ný grein, sem verður 60. gr., er orðist svo:

Hverjum eimkatli, sem vinnur með meira en  $2.5 \text{ kg/cm}^3$  þrýstingi og hefur meira en  $6 \text{ m}^2$  hitaflöt, skal fylgja skoðunarbók, sem gefin er út af eftirlitinu. Skal skoðunarmaður færa í bók þessa niðurstöður skoðunar.

Gæzlumaður ketilsins skal færa í bókina alla þá galla, sem hann kann að verða var á katlinum, hvernig bætt er úr þeim og annað, sem máli skiptir samkvæmt formi bókarinnar.

## 8. gr.

Greinatala reglugerðarinnar breytist samkvæmt framangreindu.

Reglugerð þessi er hér með sett samkvæmt lögum nr. 24 7. maí 1928 og birtist til eftirbreytni öllum þeim, sem hlut eiga að máli.

*Atvinnu- og samgöngumálaráðuneytið, 30. júní 1941.*

**Ólafur Thors.**

*Páll Pálmason.*